

Mid-Day Dogri News Bulletin, 12th July 2025

समे — 12:25

<><><><><><>

PM Rozgar Mela

प्रधानमंत्री नरेन्द्र मोदी होरें बक्ख-बक्ख सरकारी मैहकमें च नमें भर्ती नौजवानें गी अज्ज वीडियो कांफ्रेंस दे राहें 51 ज्हार शा मते नियुक्ति पत्तर बंडडे। केन्द्र सरकार दी इस बशेश पैहलकदमी तैह्त् आयोजित एह् 16मां रोजगार मेला हा ते एह्दा आयोजन मुख्य भरै दिएं 47 थाहरें पर कीता गेआ। इस मौके अपने संबोधन च प्रधानमंत्री नरेन्द्र मोदी होरें आखेआ जे ऐसे रोजगार मेलें दे राहें हुनै तोहड़ी लक्खां बद्धे नौजवानें गी भारत सरकार च पक्की नौकरी मिली चुकी दी ऐ ते हून एह् नौजवान राश्ट्र निर्माण च बड़ी बड़ी भूमिका निभा करदे न। उ'नें आखेआ जे एह् रोजगार मेले, विकसित भारत दे निर्माण च युवाएं गी सशक्त बनाने दी उ'दी सरकार दी वचनबद्धता गी दर्शादे न। श्री मोदी होरें आखेआ जे अज्ज पूरी दुनिया इस गल्लै गी मन्ना करदी ऐ जे भारत दे कोल द'उं बड़ी ताकतां न जिंदे चा इक साढ़ी सभ्मनें शा बड़ी युवा आबादी ते दुई सभ्मनें शा बड़ा लोकतंत्र ऐ। उ'नें आखेआ जे भारत सरकार छड़ा सरकारी खेत्तर गै नेई, सगुआं निजी खेत्तर च बी रोजगार दे नमें मौका पैदा करने बक्खी बी ध्यान देआ करदी ऐ। उ'नें आखेआ जे स्टार्ट अप तंत्र, नमिएं काह्डें ते शोध दी जेहड़ा बवस्था अज्ज देसै च बना करदी ऐ ओह्दे कन्नै पक्क गै देसै दे नौजवानें दी समर्थ च बाददा होआ करदा ऐ।

<><><><><><>

LG Delegation

साबका मंत्री ते पीपुल्स डेमोक्रेटिक फ्रंट दे अध्यक्ष हाकिम मोहम्मद यासीन होरें 'अपनी पार्टी' दे लीडरें कन्नै कल श्रीनगर च लेफ्टिनेंट गवर्नर मनोज सिन्हा हुंदे कन्नै मलाटी कीती। डेलीगेशन नै बक्ख-बक्ख मुद्दें बारै एलजी हुंदे कन्नै गल्लबात कीती जिंदे च नौजवानें गी सशक्त बनाना, सैलसफा खेत्तर गी बढ़ावा देना ते बडगाम जिले दी किश सैलानी थाहरें गी परतियै खोलने बारे विचार करना शामिल हा। तोआई कश्मीर थमां गैर विस्थापित अल्पसंख्यक युवाएं दे इक डेलीगेशनै बी एलजी हुंदे कन्नै मलाटी कीती ते कश्मीर च रवै'रदे गैर विस्थापित अल्पसंख्यक समुदाय दी भलाई बेहतरि आसतै केई मामलें गी उजागर कीता। तोआई एलजी होरें डॉ. मोहम्मद शोयब जहूर हुंदे आसेआ लिखे गेदे इक गीत "जय कश्मीर" गी बी जारी कीता। श्री सिन्हा होरें इस गीत च दफा 370 खत्म होने दे बाद जम्मू-कश्मीर च इकजुटता, तरक्की ते बदलाव दी कहानी ब्यान करने लेई डॉ. जहूर ते उंदी टीम दी सराहना कीती।

<><><><><><>

CS-MSME Health Clinic

जम्मू कश्मीर च औद्योगिक खेत्तर गी विकास दी बत्ते पर अगड़ा बधाने दे मकसद कन्नै मुख् सचिव अटल डुल्लू होरें कल जम्मू कश्मीर पर पैहला-पैहला एम.एस.एम.ई सेहत क्लीनिक शुरू कीता। एह् पैहलकदमी सरबंधत धड़ें ते माहिरें आसेआ कीती गेदी सफारशें मूजब कीती गई ऐ तां जे औद्योगिक इकाइएं गी पेश ओने आहली चुनौतिएं गी असरदार ढंगै कन्नै हल कीता जाई सकै। उद्घाटनी समारोह च बोलदे होई मुख् सचिव होरें

आखेआ जे एह सेहत क्लीनिक औद्योगिक इकाइएं दिएं परेशानियें गी दूर करने च मता कारी दा साबत होग। उनें एह बी गलाया जे एहदे तैहत उपलब्ध करोआई जा'रदी सेवां निरपक्ख, डेटा आधारित ते जरूरत साहबै होनियां अत्त लाजमी न।

<><><><><><>

Amarnath Yatra

जारी श्री अमरनाथ जी दी यात्रा दे कल 9में घ्याड़े कुल 18 जहार 10 श्रद्धालुएं बाबा बर्फानी हुं'दे दरबार च मत्था टेकेआ जेह्दे कन्नै 3 जुलाई थमां शुरू होई दी इस ब'रे दी अमरनाथें दी यात्रा दरान पवित्र गुफा च हिमलिंग दे दर्शन करने आहले श्रद्धालुएं दी गिनतरी 1 लक्ख 60 जहार कोला उप्पर पुज्जी गई ऐ। आकाशवाणी दे जम्मू संवाददाता नै जानकारी दित्ती ऐ जे कल संजा तोड़ी पवित्र गुफा च मत्था टेकने आहलें दी गिनतरी 1 लक्ख 63 जहार 726 होई गई ऐ। तोआई जम्मू थमां अज्ज बड्डलै 6 जहार 639 श्रद्धालुएं गी लेइयै जम्मू दे भगवती नगर आहले यात्री निवास आधार शिविर थमां 11मां जत्था घाटी लेई रवाना होआ। लौहकी-बड्डी कुल 275 गड्डिं दे काफले च सोआर इनें श्रद्धालुएं च 4 जहार 955 मर्द, 1 जहार 462 महिलां, 41 न्याणे, 144 साधु ते 37 साध्वियां शामिल न। इंदे चा 2 जहार 337 श्रद्धालु बालटाल जिसलै के 4 जहार 302 श्रद्धालु पहलगाम आले रस्तेया पवित्र गुफा लेई अपनी अगड़ी यात्रा शुरू करडन।

<><><><><><>

Hajj Committee

जम्मू कश्मीर हज कमेटी दे मजूदा मिंबरें दा कार्यकाल कीजे मुक्कने आहला ऐ, इस करियै नमीं कमेटी लेई मिंबर चुनने दी प्रक्रिया शुरू होई चुकी दी ऐ। आकाशवाणी दे जम्मू संवाददाता नै जानकारी दित्ती ऐ जे लेफ्टिनेंट गवर्नर मनोज सिन्हा हुंदे आसेआ 20 जुलाई 2022 गी खडेरी गेदी इस कमेटी दा कार्यकाल इस म्हीने दी 19 तरीक गी खत्म होआ करदा ऐ। हज कमेटी दे नियमें मूजब, नमीं कमेटी च 7 मिंबर होंगन, जिंदे च इक मजूदा मिंबर पारलिमेंट, दुरुं विधायक ते इक मिंबर मकामी निकाए थमां प्रतिनिधि दे तौरा पर एह्दे च शामिल होग। केन्द्र शासत प्रदेश लेई संविधान दी दफा 239 मूजब, लेफ्टिनेंट गवर्नर होर हज कमेटी दे प्रशासक न ते उनें'गी गै कमेटी नियुक्त करने दा इख्तेयार बी हासल ऐ।

<><><><><><>

Accident

रामबन जिले दे सेनाबाथी डबदरोड़ा इलाके च कल संजा इक टाटा सूमो गड्डी सिड़कै परा रूलकियै हेठ कोई 800 फुट डूहंगी खाई च जाई डिग्गी जिस करी 5 जनें दी मौत होई गई ते 1 व्यक्ति जख्मी होई गेआ। साढ़े रामबन जिला संवाददाता अजयदीप मूजब, एह गड्डी सेनाबाथी थमां उखराल बक्खी जा करदी ही ते एह्दे च कुल 6 लोक सोआर हे। पुलसै मामला दर्ज करियै अगड़ी जांच दा कम्म शुरू करी दित्ते दा ऐ। लेफ्टिनेंट गवर्नर मनोज सिन्हा ते केन्द्री मंत्री डॉ. जितेन्द्र सिंह होरें इस हादसे पर दुख प्रगट कीता ऐ।

<><><><><><>